



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍՆԱՆԿՈՒԹՅԱՆ ԴԱՏԱՐԱՆ
Ո Ր Ո Շ ՈՒ Մ**

Պարտապանի լուծարման վարույթ սկսելու մասին

«15» հունիսի 2023թ.

ք. Երևան

ՀՀ սնանկության դատարանի դատավոր Լ. Կատվալյանս, քննության առնելով սնանկության գործով ըստ դիմումի ՀՀ ՊԵԿ-ի՝ «ԼԵՈ 666» ՍՊԸ-ին (ՀՀ, ք. Երևան, Լեոյի փ. 72, պետական գրանցման համար՝ 286.110.1196225, պետական գրանցման ամսաթիվ՝ 17.09.2021թ., ՀՎՀՀ՝ 02846724) սնանկ ճանաչելու պահանջի մասին, պարտապանի լուծարման վարույթ սկսելու հարցը,

Պ Ա Ր Զ Ե Ց Ի

ՀՀ ՊԵԿ-ը 2022թ. մայիսի 19-ին դիմում է ներկայացրել ՀՀ սնանկության դատարան՝ «ԼԵՈ 666» ՍՊԸ-ին սնանկ ճանաչելու պահանջով:

Դիմումի հիման վրա կազմվել է թիվ ՍՆԴ/1459/04/22 սնանկության գործը, որը 19.05.2022 թվականին մակագրվել է դատավոր Լ. Կատվալյանիս:

Դիմումը դատավորի աշխատակազմին հանձնվել է 20.05.2022 թվականին:

ՀՀ սնանկության դատարանը 20.05.2022 թվականի դրությամբ դիմումն ընդունվել է վարույթ:

Միաժամանակ ՀՀ Արդարադատության նախարարություն է ուղարկվել ժամանակավոր կառավարչի թեկնածություն ներկայացնելու վերաբերյալ պահանջագիր՝ սահմանված կարգով «ԼԵՈ 666» ՍՊԸ-ի սնանկության գործով ժամանակավոր կառավարչի թեկնածությունը դատարան ներկայացնելու նպատակով:

ՀՀ սնանկության դատարանի 06.06.2022թ. որոշմամբ սնանկության գործով ժամանակավոր կառավարիչ է նշանակվել Արմեն Խաչատրյանը:

«ԼԵՈ 666» ՍՊԸ-ին և վերջինիս տնօրենին ուղարկված փաստաթղթերը ետ են վերադարձվել ՀՀ սնանկության դատարան:


ՀՀ սնանկության դատարանի 18.08.2022թ. որոշմամբ «ԼԵՈ 666» ՍՊԸ-ի, նրա գույքի, ինչպես նաև հաշվապահական և այլ փաստաթղթերի նկատմամբ հայտարարվել է հետախուզում:

13.12.2022թ. ՀՀ սնանկության դատարան է մուտքագրվել սնանկության գործով կառավարիչ Արմեն Խաչատրյանի միջնորդությունը՝ սնանկության գործի վարույթը պարզեցված ընթացակարգով շարունակելու մասին:

Միջնորդությանը կից ներկայացվել է ՀՀ ՀԿԱԾ Կենտրոն, Նորոշ Մարաշ և Էրեբունի-Նուբարաշեն վարչական շրջանների բաժնի որոշումը՝ կատարողական վարույթն ավարտելու մասին:

ՀՀ սնանկության դատարանի 14.12.2022 թվականի որոշմամբ թիվ ՍՆԴ/1459/04/22 սնանկության գործը շարունակվել է պարզեցված ընթացակարգով:

Պարտապանին հասցեագրված դատավարական փաստաթղթերը կրկին ետ են վերադարձվել դատարան:



ՀՀ սնանկության դատարանի 23.01.2023 թվականի վճռով պարտապանը ճանաչվել է սնանկ:

ՀՀ սնանկության դատարանի 01.02.2023թ. որոշմամբ սնանկության գործով կառավարիչ է նշանակվել Արմեն Խաչատրյանը:

«ԼԵՈ 666» ՍՊԸ-ին սնանկ ճանաչելու մասին հայտարարությունը հրապարակվել է <http://www.azdarar.am> հասցեում գտնվող Հայաստանի Հանրապետության հրապարակային ծանուցումների պաշտոնական ինտերնետային կայքում:

ՀՀ սնանկության դատարանի 19.04.2023թ. որոշմամբ հաստատվել է «ԼԵՈ 666» ՍՊԸ-ի նկատմամբ դատարան ներկայացված պահանջների վերջնական ցուցակ:

Սնանկության գործով կառավարիչ Արմեն Խաչատրյանի կողմից 26.05.2023թ. դատարան է ներկայացվել միջնորդություն՝ պարտապան ընկերության նկատմամբ լուծարման վարույթ սկսելու մասին:

Ուսումնասիրելով գործի նյութերը՝ դատարանը գտնում է, որ պարտապան ընկերության նկատմամբ պետք է սկսել լուծարման վարույթ հետևյալ պատճառաբանությամբ.

ՀՀ քաղաքացիական օրենսգրքի 67-րդ հոդվածի 4-րդ կետի համաձայն՝ իրավաբանական անձը լուծարվում է նաև սնանկության հետևանքով:

«Սնանկության մասին» ՀՀ օրենքի 70-րդ հոդվածի առաջին մասի համաձայն՝ Սույն օրենքով սահմանված ժամկետում ֆինանսական առողջացման ծրագիր չներկայացվելու, ներկայացված ծրագրի հաստատումը մերժվելու, ֆինանսական առողջացման ծրագիրը վաղաժամկետ դադարեցվելու, ֆինանսական առողջացման ծրագրի կատարման մասին կառավարչի հաշվետվության հաստատումը մերժվելու դեպքում դատարանը որոշում է կայացնում պարտապան իրավաբանական անձի լուծարման կամ պարտապան անհատ ձեռնարկատիրոջ գործունեության դադարեցման վարույթ սկսելու մասին (այսուհետ՝ պարտապանի լուծարում): Իսկ «Սնանկության մասին» ՀՀ օրենքի 60-րդ հոդվածի երկրորդ մասի համաձայն՝ Ֆինանսական առողջացման ծրագիրը պետք է ներկայացվի մինչև առաջին ժողովը:

Տվյալ դեպքում «ԼԵՈ 666» ՍՊԸ-ի պարտատերերի առաջին ժողովը նշանակվել է 2023 թվականի մայիսի 22-ին ժամը 10:00-ին:

Մինչև պարտատերերի առաջին ժողովը «Սնանկության մասին» ՀՀ օրենքի 60-րդ հոդվածի առաջին մասով նշված անձանց կողմից «ԼԵՈ 666» ՍՊԸ-ի ֆինանսական առողջացման ծրագիր չի ներկայացվել, ինչպես նաև դատարանը չի ստացել այդ ծրագրի ներկայացման ժամկետը երկարացնելու միջնորդություն, հետևաբար դատարանի գնահատմամբ պարտապան ընկերության նկատմամբ պետք է սկսել լուծարման վարույթ:

Միաժամանակ դատարանը, հանգում է այն հետևության, որ «ԼԵՈ 666» ՍՊԸ -ի նկատմամբ լուծարման վարույթ սկսելու պայմաններում անհրաժեշտ է կասեցնել վերջինիս գործունեությունը. գույքը կառավարելու և տնօրինելու նրա բոլոր իրավունքները, ինչպես նաև պարտավորեցնել սնանկության գործով կառավարչին արգելանք դնելու պարտապանին պատկանող գույքի և դրամական միջոցների վրա՝ բացառությամբ օրենքով նախատեսված դեպքերի:

«Սնանկության մասին» ՀՀ օրենքի 19-րդ հոդվածի առաջին մասի «ե» կետի համաձայն՝ պարտապանին լուծարելու մասին որոշում կայացնելու պահից անհապաղ որոշում է կայացնում պարտապանի գույքը տնօրինելու և կառավարելու իրավունքները կասեցնելու մասին., իսկ «ը» կետի համաձայն՝ արգելանք է դնում պարտապանին պատկանող գույքի և դրամական միջոցների վրա, բացառությամբ «Վճարահաշվարկային համակարգերի և վճարահաշվարկային կազմակերպությունների մասին» Հայաստանի Հանրապետության օրենքով նախատեսված դեպքերի.:

Նույն օրենքի 71-րդ հոդվածի առաջին մասի համաձայն՝ Դատավորի կողմից պարտապանի լուծարման վերաբերյալ որոշումը կայացնելուց հետո՝ 7 օրվա ընթացքում,

ավարտիչը դատարանի որոշման հիման վրա արգելադրում է պարտապանին սեփականության իրավունքով պատկանող գույքը, բացառությամբ այն գույքի, որի վրա, Հայաստանի Հանրապետության օրենսդրության համաձայն, բռնագանձում չի կարող տարածվել:

Ելնելով վերոգրյալից, հիմք ընդունելով ՀՀ քաղաքացիական օրենսգրքի 67-րդ հոդվածի 4-րդ կետը, «Սնանկության մասին» ՀՀ օրենքի 19-րդ հոդվածի 1-ին մասի «է», «ը» կետերը, 70-72-րդ հոդվածները և ղեկավարվելով ՀՀ քաղաքացիական դատավարության օրենսգրքի 199-րդ, 200-րդ հոդվածներով՝

Ո Ր Ո Շ Ե Ց Ի

1. Սկսել պարտապան «ԼԵՈ 666» ՍՊԸ-ի (ՀՀ, ք. Երևան, Լեոյի փ. 72, պետական գրանցման համար՝ 286.110.1196225, պետական գրանցման ամսաթիվ՝ 17.09.2021թ., ՀՎՀՀ՝ 02846724) լուծարման վարույթ:

2. Հանձնարարել իրավաբանական անձանց պետական գրանցում իրականացնող պետական մարմնին՝ օրենքով սահմանված կարգով կատարելու համապատասխան գրառում իրավաբանական անձանց պետական գրանցամատյանում:


3. Հանձնարարել սնանկության գործով կառավարչին.

ա) 5 օրվա ընթացքում պարտապանի լուծարման մասին որոշումը հրապարակել <http://www.azdarar.am> հասցեում գտնվող Հայաստանի Հանրապետության հրապարակային ծանուցումների պաշտոնական ինտերնետային կայքում:

բ) 7 օրվա ընթացքում արգելադրել «ԼԵՈ 666» ՍՊԸ-ին սեփականության իրավունքով պատկանող գույքը, բացառությամբ այն գույքի, որի վրա, ՀՀ օրենսդրության համաձայն, բռնագանձում չի կարող տարածվել:

4. Կասեցնել «ԼԵՈ 666» ՍՊԸ-ի գործունեությունը. գույքը կառավարելու և տնօրինելու պարտապանի բոլոր իրավունքները:

ԴԱՏԱՎՈՐ



Լ. ԿԱՏՎԱԼՅԱՆ